

TRABAONAN A CUMINSA NA PARQUE ALAMEDA

ORANJESTAD (AAN) - DIARIO a observa cu e trabao di restauracion di Parque Alameda, al fin, ta tumando lugar.

Por a observa varios trahador di un compania contratista, trahado riba cortamento di mata, y limpieza di e tera unda cu tin palo sembra.

Segun informacion cu DIARIO ta dispone di dje, ta asina cu ora e parque ta bin cla, un grupo di trabao, sea di e mesun empresa contratista of otro, ta bay sigui cu trabao di mantencion di e parque un biaha pa siman, esta riba Dialuna.

Ohala lo bin control policial mas continuo den e lugar aki, ya cu ta dificil pa cambia mentalidad di hende, y no por kita afo cu apesar di tur esfuerso realiza pa D.O.W y apesar di e trabao duro di e obreronan, algun hende sin amor patrio ni actitud civico, por sigui haci e lugar sushi of sinta bebe alcohol den e parque aki, manera ta custumber.

Lo ta bon pa comunidad mes haci mas uso di e parque di un manera conciente, ya cu ta trata di un lugar basta safe pa muchanan core y hunga eyden, y pa sinta un rato haya un tiki fresco. Por ta cu si parti di e comunidad conciente ta bishita mas e parque, esnan cu ta haci mal uso di dje ta aleha nan mes, pa temor cu otronan yama polis si mira nan haci e lugar sushi of comporta di manera incorrecto.